

付法藏因緣經卷第二

集二

後魏沙門吉迦夜共曇曜譯

摩訶迦葉垂涅槃時以最勝法付囑阿難而作是言長老當知昔婆伽婆以法付我我年老朽將欲涅槃世間勝眼今欲相付汝可精勤守護斯法

集二

阿難曰諾唯然受教於是阿難演暢妙法化諸衆生然其宿世有大功德智

慧淵廣多聞博達佛所咨嗟總持第一悉能聽受諸佛法藏如大巨海百川斯納名稱高遠衆所知識如是功德不可窮盡我當隨順說其因緣乃往古世阿僧祇劫定光如來時爲沙門畜一沙彌常令讀誦日夜誠勑無有休廢若經少闕即便呵責時此沙彌爲師乞食若少稽留經不充限極爲其師之所罵辱於是沙彌甚爲愁惱爲師乞食且誦且行時

有長者怪而問之沙彌答曰吾師嚴峻令我誦習乞食稽留則不充限以是事故每行讀誦長者答言勿生憂苦從今以後常相供給宜當精勤誦習經典時此沙彌不復行乞專心誦讀從此以後經常充足爾時沙彌即世尊是施食長者阿難是也以斯福緣阿難比丘智慧深妙總持強識多聞弘廣不可稱記至婆伽婆成無上道宣暢妙法化諸衆生於是阿難即自思惟世間牢獄不可愛樂五欲如幻無有堅實甚可畏惡過於毒蛇盛年勇壯顏容姿美悉爲老病之所殘害無常迅駛如瀑河流吞滅一切恩愛集會古昔諸王威德自在爲無常風之所吹壞憂悲哀惱衆苦相續愛羅刹女常欺衆生我當云何得免斯難復作是念如來世尊神智超世本從釋氏

出家學道我今應當往爲弟子即至佛所求哀出家佛言善來便成沙門爾時如來即爲說法所謂施論戒論生天之論欲爲不淨出要最善意即開解成須陀洹佛於後時心念侍者時憍陳如即往佛前求爲給侍佛言憍

集二

二

陳如汝年老邁須人瞻視云何爲我而作給侍如是五百大弟子咸至佛所求爲侍者皆不聽許禮佛而退時目犍連以他心智觀如來心在阿難所如日初出光照西壁與諸比丘告阿難曰佛須仁者以爲給侍宜可速往禮觀勝覺阿難言曰如來威德猶如大龍今我穢弱不敢奉命諸比丘言阿難當知世尊專心唯在仁者當速奉觀不宜久停阿難敬諾即求三願如來故衣願勿與我所有遺食願賜餘人進現時節隨我裁量三願若遂乃

當受教時諸比丘往世尊所稽首作禮具陳上事如來歎曰善哉阿難有大智慧善知時宜不但今日久遠亦然汝等善聽吾當宣說乃往過去阿僧祇劫有王治世住婆蹉城於此城中有婆羅門名俱樓陀聰明博達天才超世國人居士皆悉宗敬多饒財寶百千萬億無子紹繼每懷憂惱請祈諸天經十二年最大夫人便覺有娠日月已滿生一男兒身紫金色顏貌端正相師占曰福德此子即爲立字號曰大施年漸長求父出遊父即勑令嚴治道路燒香散華作衆妓樂大施於是出外遊觀即於前路見有乞人著弊壞衣卑言求哀大施問曰何故若此乞人答言我本孤貧病苦所逼身命既切是故行乞大施聞之慘然歎曰群生之類一何可愍愚癡蔽心

集二

三

沉沒五欲爲老病死之所惱害方於其中坦然快樂不修善業受斯惡果怪哉大險甚可怖畏小復前行見有屠獵羅網飛鳥耕墾魚捕多所傷害大施問言何故若此諸人答曰我祖父來素爲斯業仰此濟命兼供王役一旦捨之便當貧乏大施聞之益增傷感便自思惟興大悲意哀哉衆生愚無慧日久積罪業貧窮羸劣處大黑闇甚可怖畏今復更造如斯惡業殺害衆生斷他愛命惡業增長不善滋息輪迴五道何由得出我今宜當方便救護生死惱熱爲作清涼作是念已即入大海詣龍王宮求如意珠見一金城光明赫奕毒蛇圍繞不可得近即入慈定履上而過龍王出迎禮拜恭敬相慰問已俱共入宮問言仁者何故至此大施答曰闍浮提人爲貧窮

故極多傷害命終必當生三惡道我愍彼故歷險來此求如意珠欲免其苦願見遺給利益衆生龍王曰善不違來教願少留停爲我說法大施許之住經四月演暢諸法名字本末次第隨順解其句味龍王至心聽受思惟問訊起居甚得時宜進現時節而自裁量過四月已大施辭退龍解髻珠而用與之因發誓曰大士慈悲甚極弘廣必當得成自然正覺願我得爲多聞弟子於是大施以如意珠兩衆七寶闇浮提人皆悉安樂修行十善命終生天比丘當知爾時大施即吾身是彼時龍王阿難是也在龍王中尚知時宜況於今者而不通達於是阿難給侍如來善能隨順聞持法藏初無漏失逮及世尊於雙樹林垂般涅槃問橋陳如阿難所在答言今在娑羅

林外爲諸魔衆之所擾亂深入邪網甚大苦惱除佛如來無能救護文殊師利白佛言世尊此大衆中有諸菩薩於無量劫發菩提心久修願行得不退轉如是等比善能受持諸佛法藏何緣顧問阿難所在佛告文殊阿難

比丘事我來久初無過咎具足成就不可思議所聞之法善能受持譬如瀉水置之異器爲諸衆生所共瞻仰是故我問阿難所在今去此會十二由旬爲諸魔衆之所惱亂汝持我呪往彼解之文殊師利即至魔所說陀羅尼魔聞是已即放阿難與文殊俱來至佛所稽首禮敬却坐一面爾時世尊於中後夜入般涅槃一切天人大設供養毘盧闍毗其事都訖摩訶迦葉與諸羅漢於王舍城欲集世眼阿難爾時猶在學地以漏未盡不預聖衆

時有比丘名婆闍弗即以偈頌而覺悟之勝哉多聞士 安靜林樹間 當觀一切法虛偽不堅牢 生死多過患 涅槃最清淨瞿曇子宜應 勸修無漏行 如是當不久必受第一樂

阿難聞已竟夜經行雖加勤苦不得羅漢身體疲憊便欲眠息頭未至枕得無著果三明無礙六通清徹即便飛往賓鉢羅窟在門外立而說偈言

多聞辯才 紿侍正覺 瞿曇阿難 今在門外爾時迦葉說偈答曰

汝若盡衆苦 棄捨煩惱擔 宜應現神力令衆咸證知

於是阿難即以神通從石壁入禮衆僧足隨次而坐受迦葉命演集勝眼乃至迦葉入涅槃

槃時共阿闍世王至雞足山燒香散華讚歎
供養王言仁者如來迦葉入般涅槃自我多
殃悉不覩見尊若滅度唯願垂告阿難曰善
敬承來教於是遊行宣暢妙法化諸衆生皆
令度脫最後至一竹林之中聞有比丘誦法
句偈

若人生百歲 不見水潦涸 不如生一日

而得覩見之

阿難聞已慘然而歎世間眼滅何其速哉煩
惱諸惡如何便起違反聖教自生妄想無有
慧明常處癡闇永當流轉生死大海爲老病
死之所惱逼便語比丘此非佛語不可修行
汝今當知二人謗佛一雖多聞而生邪見二
不解深義顛倒妄說有此二法爲自毀傷不
能令人離三惡道汝今當聽我演佛偈

若人生百歲 不解生滅法 不如生一日
而得解了之

爾時比丘即向其師說阿難語師告之曰阿
難老朽智慧衰劣言多錯謬不可信矣汝今
但當如前而誦阿難後時聞彼比丘在竹林
下猶誦前偈即問其意答言尊者吾師告我
阿難老朽言多虛妄汝今但當依前誦習阿
難思惟彼輕我言或受餘教即入三昧推求
勝德不見有人能迴彼意便作是言異哉無
常甚大雄猛散壞如是無量賢聖令諸世間
皆悉空曠常處黑闇怖畏中行邪見熾盛不
善增長誹謗如來斷絕正教永當沉沒生死
大河開惡趣門閉人天路於無量劫受諸苦
惱哀哉世間深可矜愍今此比丘我躬爲說
反納邪言不受吾教我當向誰說如斯事世

間衆苦不可願樂此身不堅腐敗危脆猶如聚沫須臾變滅端正容貌甚可愛著衰老既至將安所在覆以薄皮謂爲嚴飾膿血內流惡露不淨有爲無常甚大迅速一視息頃四百生滅譬如虛空震雷起雲暴風卒起尋便

集二

七

散滅五欲不堅亦復如是共相恩愛安隱快樂無常既至誰有存者世間衆苦甚難久居我於今日宜入涅槃又吾大師及同梵行如是之等皆悉滅度我於今者豈宜久停復作是念阿闍世王與吾有要我宜應當至彼語之即詣王宮告守門者爲我白王阿難在外將欲涅槃故來相見門人答曰王今眠睡若覺寤者罪我不少阿難語言王若覺者宜可爲我具宣斯意阿闍世王夢蓋莖折即便驚寤門人向王具宣上事王聞是已悶絕躋地

冷水灑面良久乃稣發聲號哭哀動天地槌胷叫喚生大憂苦而作是言嗚呼怪哉世間眼滅三界苦惱誰當勉濟昔日世尊慈悲深厚爲諸衆生作大依止自入涅槃世間孤露摩訶迦葉有大名稱次補如來演法教化而復滅度法輪衰損瞻仰阿難猶如日月今入涅槃更何恃怙法水清淨洗滌塵勞誰復頒宣饒益一切是諸衆生常有渴愛誰澍法雨充足之者三界群生永當流轉受諸苦惱何有窮竟魔王歡喜大得眷屬善法漸盡諸惡熾盛即問門人阿難所在園神白王向毗舍離即嚴四兵往恒河側阿難乘船在河中流王即直進稽首白言三界明燈已棄我去今相憑仰願勿涅槃阿難默然而不許可於時大地六種震動時雪山中有五百仙見斯相

已咸作是念以何因緣有此異相觀見阿難
將欲滅度即便飛空往詣其所稽首作禮求
哀出家即化恒河變成金地爲諸仙人如應
說法鬚髮自落成阿羅漢咸悉俱時入般涅槃
集二 阿難念曰佛記罽賓當有比丘名摩田提
於彼國土流布法眼即便以法付摩田提踊
身虛空作十八變入風奮迅三昧分身爲四
分一分向忉利天與釋提桓因一分與大海
娑伽龍王一分與彼毗舍離子一分授與阿
闍世王如是四處各起寶塔燒香散華供養
舍利摩訶迦葉垂涅槃時告阿難曰今以法
寶用相委累長老於後若入涅槃王舍大城
有一長者名商那和修高才勇猛有大智慧
已於過去深種善根故發意入海採取珍寶
迴還願作般遮于瑟爲佛如來造經行處後

當建立高門樓屋所爲既訖可度出家如來
法藏悉付囑之是故阿難臨當滅度而告之
曰佛以法眼付大迦葉迦葉以法囑累於我
如我今者涅槃時至以法寶藏用付於汝汝
可精勤守護斯法令諸衆生服甘露味商那
和修答曰奉教我當擁護如斯妙法普爲一
切作大明炬於是次宣無上法藥療煩惱病
濟度群生其德高遠久修願行多聞總持辯
才無盡今當敷演彼功德聚乃往過去阿僧
祇劫商那和修時爲商主共諸賈客五百人
集二 俱欲入大海採求珍寶於其前路見辟支佛
身嬰重病氣命羸憊與諸商人即便停住推
求醫藥而療治之盡心承給無所乏少病遂
除差體力充足是辟支佛著商那衣爾時商
主以諸香湯浴辟支佛上妙氳衣而用奉獻

白言大聖此商那衣極爲弊惡唯願受我所奉衣服辟支佛言施主宜知我以此衣出家成道復當著此而入涅槃商主聞之甚懷悲惱白言大聖願勿滅度宜可與我共入大海吾當終身供給所須衣服卧具病瘦湯藥辟支佛言不能入海我於今者欲般涅槃汝於福田宜生深心未來必當獲大果報即飛虛空作十八變還就本座而入涅槃商主悲哀啼哭哽噎積諸香木而用闇毗收集舍利起塔供養因發誓曰願我來世值遇聖師復過於是使我所有諸功德聚威儀法式及以衣服如今此聖等無有異由斯願力甚大雄猛處於母胎著商那衣乃至與身俱共增長出家受戒得道涅槃是商那衣未嘗離體因即號曰商那和修如來昔遊摩突羅國見青樹

林敷榮茂盛告阿難曰見此林不阿難言曰唯然已見佛言此是優留茶山吾滅度後當有比丘名商那和修於此山中起僧伽藍說法教化多所利益商那和修既從海還大獲珍寶往詣竹林禮阿難足白言大聖我本入海願安隱還爲佛及僧設大施會今佛世尊爲在何處阿難答曰已入涅槃聞是語已悶絕躰地以水灑面方得醒悟發聲號咷悲泣斷絕自拔頭髮塵土全身槌胷大叫淚下如雨便作是言無常大惡壞斯寶聚世間孤露永無恃怙我何薄祐罪障深厚佛日明淨而不覩見永當沉沒三有苦海復問阿難摩訶迦葉大目捷連舍利弗等悉爲在不阿難答曰皆以滅度旣聞是語倍增憂感白言大聖我本入海願安隱還爲佛及僧設大施會我

於今者欲爲聖衆辦少微供唯願哀愍而見聽許阿難答言善哉長者能知世間不安危脆於勝福田起堅固業長者當知諸法無常無我我所譬如假借不可久保若汝欲得無上利者宜於福田起殷重業此之果報不可沮壞商那和修即便嚴辦爲般遮千瑟種種充足造經行處及門樓屋其事訖已阿難告曰汝爲財施最大希有今復宜當作於法施此施微妙甚爲弘廣勝於財施百千萬倍商那和修問言何名法施阿難答曰於佛法中出家學道說法教化利益衆生是名法施商那和修答言善哉甚適我願於是阿難度令出家與受具戒白言大師我今生時著商那衣今當盡形受持此服作是語已得總持力所聞之法未曾忘失成阿羅漢有大功德逮

集二
十一

及阿難入涅槃後頒宣妙法饒益衆生阿難所持八萬四千諸法藏門商那和修悉能憶念譬如漏水置之異器彼能受持亦復如是以真淨法遊行教化最後次至摩突羅國於曼陀山欲起住處時彼山中有二龍子毒害熾盛不可擾近商那和修即以神力震動此山龍大嗔怒起惡風雨商那和修入慈三昧以定力故龍毒消滅即大驚怖生信敬心問言尊者有何教誨商那答曰佛記此山有僧住處是故我欲於中建立龍子白言若實佛記善哉相聽商那和修即於彼山營建住處禪室經行皆悉具足内外空閑無諸憒鬧造住處已便作是念佛記罽賓安隱豐樂國土閑靜離諸妨難清涼少病甚可經行我今應當至彼處也即便飛空往罽賓國入定歡喜

而說偈言

常著商那衣 成就五支禪 山巖空谷間
坐禪而念定 風寒諸勤苦 悉能忍受之
心善得解脫 智慧自莊嚴 猶如空野象
坦然無憂患

時優波鞠多有五百弟子猶處生死不得解脫心生憍慢甚大貢高優波鞠多即入三昧觀此諸人與已無緣唯有吾師乃能化度便至心念商那和修商那和修即以神力如大鵝王從空飛來至其所止優波鞠多行至餘處唯諸弟子而獨見之商那和修衣裳麤弊髮爪長利至優波鞠多房坐其座上優波鞠多弟子咸生瞋忿是何弊人處我師座即欲驅逐使令出外如須彌山不可傾動欲出惡言口自噤閉即共相將至優波鞠多所白言

大師有老比丘形容憔悴到師座處加趺而坐優波鞠多念言自非吾師無能坐者至房便見商那和修頭面著地稽首作禮弟子念言師雖爲禮盛德勝之商那和修知其弟子憍慢未息手指虛空便下香乳如高山頂懸泉流注問言優波鞠多是何定相優波鞠多即入三昧深心觀察不能曉了即問其師是何三昧商那和修答言此即名爲龍奮迅定如是次第五百三昧問其名字都不了知商那和修一一爲說鞠多白言我之所得盡從師受唯是三昧我非其器鞠多當知如來三昧諸辟支佛不識其名緣覺三昧一切聲聞莫能解了大目犍連舍利弗等所入三昧其餘羅漢不能測度吾師阿難三昧定相我悉不知今我三昧汝亦不識如此三昧我涅槃

後皆隨吾滅七萬七千本生諸經滿足一萬
阿毗曇藏凡有八萬清淨毗尼如斯之法亦
隨我滅是故迦多如來滅後賢聖隱沒如是
法藏漸當衰損乃至末後一切都盡汝今應
當勤加守護時諸弟子方自悔責我無智慧
集二
輕慢大聖始知吾師定不及彼於是商那和
修即爲說法五百弟子得羅漢道爾時尊者
商那和修於諸衆生所應作已飛騰虛空作
十八變還就本座而入涅槃優波迦多與諸
眷屬積諸香木以火耶旬收取舍利起塔供
養

付法藏因緣經卷第二

音釋

翹矢智切 娑升人切 窮吉弦切 翳網也切 瞢田用切
潦淥切 潶淥郎到切 懈朱劣切 嚥巨禁切 龍口閉切
易各切 瘋癡也切 口口也切